

# Jeremias

No tin duda ku Jeremias ta destaká entre profetanan...i no solamente pasobra e ta e buki profétiko mas largu den Beibel. Segun W.W. White, Jeremias tabata e hòMBER mas salú, mas hóben, mas balente, i mas grandi di historia di Tèstamènt Bieu. Un otro persona a bisa, “Entre tur e streanan ku ta bria kla den historia di Tèstamènt Bieu, tin ningun nòmber ku ta bria mas kla ku esun di Jeremias.” E palabranan aki ta espesialmente relevante pasobra Jeremias a profetisá durante e tempu mas skur di Juda su historia, tempu ku Juda a muri komo un nashon. Jeremias a biba durante e tempu ku Juda a eksperenshá e kastigu di Dios, loke Isaias a profetisá mas òf ménos shen aña anterior.

Jeremias ta konosí komo “e profeta ku ta yora” i “e profeta di kurason kibrá”. Ma Jeremias no a yora pa su mes pruebanan, maske nan tabata hopi pisá. El a yora pa e pikánan di su pais i e destrukshon teribel ku nan pikánan a okashoná.

Jeremias a biba na un tempu ku el a premirá eventonan trágiko ku lo bin. El a kompréndé mihó ku tur otro hende e signifkansasia di e eventonan. E tabata sa ku pronto e stat orguyoso di Jerusalèm i su tèmpep bunita lo ta ruína so. E tabata sa ku su pueblo stímá—e pueblo ku Dios a skohe—lo ta dominá pa paganonan pa motibu di e duresa di nan kurason. Ta p’esei el a yora.

Di tur e profetanan, Isaias i Jeremias ta esnan ku ta destaká. Si nos kompará nan ku otro, nos lo mira ku ministerio di tur dos tabata dirigí na e pais di Juda. Ma nan ministerionan tabata diferente. En kontraste di Isaias ku a biba shen aña promé ku eksilio di Juda, Jeremias a biba nèt promé i durante e eksilio di Juda. Nan a enfrentá difikultatnan diferente. Nan personalidad tabata diferente. Isaias tabata un hòMBER di kurashi, sin miedu, mientras Jeremias tabata un hòMBER suave, tímido, yen di kompashon. Isaias a pronostiká e huisionan ku lo bin si Juda no repentí. Jeremias a deklará ku e huisionan di Dios a yega, ku Dios a rechasá nan i ku nan no por hasi nada pa skapa di e kastigu ku nan ta meresé.

I ta bon pa menshoná ku algun studiante di Beibel ta haña ku despues di e buki di Salmonan, Jeremias ta e buki mas spiritual di Tèstamènt Bieu.

## I. OUTOR DI E BUKI

Ta fásil pa studia algun buki di Beibel sin tin informashon tokante e eskritor. Di bèrdat, nos no sa identidat di outor di siertu buki di Skritura. Ma den e kaso di e buki di Jeremias, nos no por studia e buki sin studia e outor. Jeremias ta un parti sumamente importante di e buki. Den e kaso aki, e profeta i su mensahe ta inseparable. Jeremias ta duna mas informashon tokante su persona ku kualke otro outor profeta di un buki di Beibel.

### A. E BIDA DI JEREMIAS

Jeremias, *Yirme-Yahu* na idioma hebreo, ta nifiká literalmente “Jehová ta tira”. No ta konosí presis kiko “tira” ke men den e konteksto aki. Pusíbelmente e ta nifiká: Jehová ta establese, Jehová ta eksaltá, Jehová ta haltu òf Jehová ta apuntá.

Jeremias a nase mientras e rei malbado, Manasés, tabata reina na Juda—kisas na año 646 B.C. El a lamta na Anatot, un pueblo chikitu algun kilometer nort di Jerusalèm (1:1). Su tata, Hilkiyas, tabata un saserdote (1:1). Kisas esaki ta e mésun Hilkiyas ku a haña e buki di lei den tèmpel durante reinado di Josias (2 Reinan 22), inisiando un reformashon religioso. Jeremias tambe lo a bira un saserdote, siguiendo den pasonan di su tata.

Dios a yama Jeremias pa ta un profeta tempu ku e tabata hóben (1:4-8), kisas ku 20 òf 21 año di edat. Esaki a sosodé na año 627 B.C. (Ta interesante ku esei tabata e mésun año ku rei Asurbanipal, e ultimo gran rei di Asiria, a muri. Despues di dje, impero di Asiria a kuminsá kai den otro i Babilonia a krese te bira un impero na su lugá.)

Debí ku e tabata biba tan serka Jerusalèm, sin duda el a bishitá Jerusalèm ku frekuensia. Asta ta parse ku el a muda pa Jerusalèm algun tempu despues di su yamada. E por a konosé e profetanan Sofonias, Habakuk, i pusibelmente Nahum. Ezekias i Daniel tambe a biba na e mésun era, ma tabata lokalísá na Babilonia.

Jeremias su ministerio a kuminsá tempu ku Josias tabata rei. Josias a stima Dios i a introdusí hopi reformashon religioso. No ta konosí si Jeremias a partisipá den e reformashonnan na komienso. Ma ta parse ku e pronto a bin mira ku e reformashonnan—maske nan tabata hopi bon—no a afektá e kurason interno di e pueblo hudiu. Nan a logra deshasí di e diosnan pagano, ma e kurasonnan a keda mes pagano!

I dicho echo. Kurason di e pueblo no tabata transformá. Asina pronto ku Josias a muri, Juda a sigui djòdjò den su paganismo i idolatria atrobe.

Jeremias lo a gosa bon kontakto ku rei Josias. Jeremias a kanta un lamento pa Josias na su entierro (2 Krónikanan 35:25).

Durante e promé añanan di su ministerio, e no a eksperensia hopi oposishon manera tabata e kaso despues. Ma tòg, na ùn okashon, habitantenan di su mes pueblo, Anatot, a traha un komplòt kontra dje pa mat'è (11:18-23). Motibu pa e oposishon no ta mensioná den e teksto.

Morto di Josias a okashoná algun kambia drástiko na pais di Juda. For di e tempu ei, Juda progresivamente a peorá. Ningun di e último kuater rei di Juda (Joakaz, Joakim, Joakin i Zedekias) a biba pa Señor. Dos di nan (Joakaz i Joakin) a reina solamente tres luna. Durante reinado di e último kuater rei, Babilonia a ataká Juda tres diferente biaha.

Morto di Josias tambe a introdusí kambionan grandi pa Jeremias tambe. Tantu reinan, mandatarionan, saserdotenan, politikonan, profetanan falsu i su mes paisanonan a oponé fuertemente kontra dje, maltrat'è i persiguié. Dikon? Pasobra el a prediká ku Dios lo kastigá Juda lagando Babilonia kaptur'è. El a rekomendá pa nan entregá na ehersito di Babilonia.

Dios a prohibí Jeremias di kasa (16:1-4), un instrukshon ku tambe a sirbi pa komuniká e mensahe pa Juda: Dios ta bai kastigá nan tan severo ku lo tin un matansia formal. Pues, asta bida di Jeremias a komuniká Dios Su mensahe. Jeremias a hiba un bida soltero pa agradá Dios.

Joakaz a reina solamente tres luna, pues talbes Jeremias no tabatin kontakto kun'è. Su buki no ta menta nòmber di Joakaz.

Probabelmente tabata durante reinado di Joakim ku e saserdote Pasur, “e ofisial prinsipal den e kas di SEÑOR” (20:1) a laga bati Jeremias i pon'è den sepanan pasobra Jeremias a prediká den plenchí di tèmpel ku Dios ta bai kastigá Su pueblo pa motibu di nan piká.

Tambe durante reinado di Joakim, e saserdotenan i profetanan falsu a purba mata Jeremias pasobra el a prediká e mésun mensahe (26:1-24). E tambe a profetisá destrukshon di e tèmpel. Esaki a kai manera un bòm serka e hudiuonan. Kasi nan a tuma e tèmpel komo un garantia di suerte: “Nos ta e pueblo skohí pa Dios. E lo no pèmití pa destruí tèmpel.” Ahikam a protehá Jeremias pa nan no mat'è (26:24). Tòg e menasa tabata serio. Joakim a mata un otro profeta di Dios, Urias, pasobra el a prediká e mésun mensahe (26:20-23). Ta notabel ku e esnan ku supuestamente a proklamá e mensahe di Dios, a oponé kontra e mensahe di Dios.

Den e di kuater aña di Joakim, Jeremias a laga Baruk skirbi e palabranan ku Dios a dun'è. Anto Jeremias a manda Baruk les'è públikamente, talbes pasobra e saserdotenan a prohibí Jeremias di dreña tèmpe. Ora rei Joakim a haña sa, el a laga lesa e ròl, anto a kòrt'è i kim'è te ora ku el a kima henter e ròl. Jeremias i Baruk a bolbe skirbi e buki (36). Probabelmente loke nan a skirbi di nobo tabata kapítulonon 1-25 so.

E siguiente rei, Joakin, tin dos otro nòmber: Konias i Jekonias. Nos no sa si Jeremias tabatin kontakto kun'è. El a reina solamente tres luna promé ku el a wòrdu kapturá i hibá komo katibu na Babilonia. Jeremias a profetisá ku esaki lo sosodé (22:24-30).

Nabukodonosor a hasi Zedekias rei di Juda. Zedekias mes tabatin tendensia pa respetá Jeremias. Ma e tabata indesisu i sin kurashi. El a laga otro hende influensí'è bes tras bes.

Durante su reinado Jeremias a sufri mas tantu. Jeremias a sigui prediká ku Juda mester entregá na Babilonia: “Pone boso nèk bou di e yugo di rei di Babilonia i sirbi é i su pueblo, i keda na bida!” (27:12). Zedekias no a skuch'è i a uni forsa huntu ku otro nashonnan ku a oponé kontra Babilonia. E akshon aki a okashoná e di tres atake di Babilonia kontra Juda.

Dios a instruí Jeremias pa kumpra tereno di un famia bankarota (32:1-15). (Esaki ta indiká ku Jeremias no tabata pover). Den e di dies aña di Zedekias su reinado, el a bai Anatot pa tuma poder di e tereno, i a wòrdu arestá, akusá di traishoná su pueblo pa uni ku Babilonia (37:11-16). Algun dia despues, Zedekias a hasi'è pregunta, “Tin un palabra for di SEÑOR” (37:17). E profeta a respondé ku e mésun mensahe di semper: “Si tin! Abo lo wòrdu entregá den man di rei di Babilonia!” Jeremias a pidi Zedekias pa no mand'è bèk den e bodega pasobra el a teme ku e lo muri ei. Zedekias ser'è den plenchi di e guardianan i a sòru pa e haña kuminda (37:21).

Jeremias a sigui prediká: “Esnan ku ta keda den stat di Jerusalèm lo muri. Ma esnan ku entregá na Babilonia lo biba.” Komo resultado su enemigunan tabata ke mat'è. Nan a pon'è den un rembak ku un fondo tur na lodo hundu pa e muri ei (38:6). Ma Ebed-melek, un etiope, a reskatá Jeremias ku permit di rei (38:7-13). Atrobe Zedekias a konsultá ku Jeremias i atrobe el a haña e mésun kontesta: entregá na Babilonia òf e stat lo wòrdu destruí (38:14-28). Lo tabata poko despues di esaki ku e ehersito di Babilonia a logra dreña e stat di Jerusalèm i destruí.

Na aña 588 B.C., Babilonia, bou mando di rei Nabukodonosor, a bin rondoná Jerusalèm. Trinta luna despues (586 B.C.), nan a destruí e suidat i tèmpe. Ku pena pisá Jeremias a mira destrukshon di Jerusalèm i tèmpe i su pueblo stima bai den kaptividat

Despues di kaída di Jerusalèm, Nabuzaradan, kapitan di guardia di Babilonia, a duna Jeremias su libertat i a ofres'è penshon na Babilonia. Ma Jeremias a skohe pa keda ku e poblashon pover hudu ku a resta na Juda (40:1-6).

Babilonia a apuntá Gedalias komo nan representante na Juda. Ma despues di poko luna, Ismael a mat'è. Maske Johanan a logra kore ku Ismael i su kumpinchan, tòg e huduunan a keda ku miedu ku ehersito di Babilonia lo regresá pa tuma vengansa nan pa e asesinato. Nan tabata ke hui pa Egipto. Nan a puntra Jeremias kiko nan mester hasi. Dies dia despues, Jeremias a duna nan Dios su mensahe: keda na Juda mes. Ma nan a nenga obedesé i tòg a hui pa Egipto. Tantu Jeremias komo Baruk a bai Egipto, sin duda fuera di nan boluntat (40:7-43:7).

Algun hudu na Egipto tabata adorá ídolonan. Ora Jeremias a hala nan atenshon riba esei, nan a nega skucha. Pesei el a laga nan sa ku Dios lo huzga nan tambe (44:26-30).

Beibel ta duna ningun detaye tokante Jeremias su morto. Segun un tradishon, e mésun huduunan ku Jeremias a stima asina tantu i a hasi tantu esfuerso pa skapa...e mésun huduunan a piedr'è na Egipto. En kontraste, huduunan ta bisa ku el a logra hui pa Babilonia i a muri aya.

Jeremias tabatin un kompañero durante gran parti di su ministerio, su sekretario, Baruk (36:4-6). Kapítulo 45 ta dirigí totalmente na Baruk.

Pues, Jeremias a kuminsá su ministerio komo vosero di Dios ora ku el a haña su yamada na aña 627 B.C. I su ministerio a kontinuá te despues di kaída di Jerusalèm (586 B.C.). Ta klaro ku su ministerio lo a dura mas ku 40 aña.

## B. E PERSONA DI JEREMIAS

Poko di e profetanan a revelá nan reakshon personal pa ku e mensahe ku nan a proklamá i loke nan a eksperensíá. Ma Jeremias a habri su kurason libremente pa su lektornan por mira. Komo resultado e lektor ta sinti ku e konosé Jeremias mihó ku tur otro profeta.

Jeremias tabata un hende sensible. Diferente biaha el a skirbi di su lágrimanan: “O ku mi kabes tabata awa, i mi wowo un fuente di lágrima, ku mi por a yora di dia i anochi pa e mortonan di e yu muhé di mi pueblo!” (9:1; 13:17; 14:17). Segun J. Vernon McGee, “Dios a skohe e hòmber aki ku tabatin kurason di un mama, un stèm ku ta tembla, i wowo yen di lágrima, pa duna un mensahe duru di huisio. E mensahe ku el a duna a kibra su mes kurason.”

Un outor a skirbi: “E no tabata un hòmber poderoso manera Elias, elokuyente manera Isaías, òf angéliko manera Ezekiel, sino un (hòmber) tímido ku ta evitá hende, konsiente di su inabilitat, anhelando pa simpatia i amor ku e nunca lo konosé—esei tabata esun skohí dor di ken Palabra di Señor a bin pa e era korumpí i degenerá.”

Jeremias su kurason tabata halá den dos direkshon. Di un banda, komo profeta, e tabata totalmente leal i obediente na Dios. Ma di otro banda, e tabata patriótiko i a stima su paisanonan apesar di nan rebeldiá kontra Dios. Maske nan piká a obligá Jeremias sufri, tòg su kurason tabata kibrá pa nan sufrimentu. Jeremias no solamente a papia *pa* Dios; e tambe a sinti *huntu ku* Dios. Kada pronóstiko di kastigu tabata muhá ku su lágrimanan.

Tin bes Jeremias tabata deskurashá i na punta pa entregá: “..si mi bisa: “Lo mi no kòrda riba djE, ni papia mas den Su nòmber,” e ora ei esei ta bira manera kandela den mi kurason, sera den mi wesunan; mi ta kansá di ten’ é paden, i mi no por mas” (20:9). E kandela di persekushon tabata kayente pafó. Ma e kandela di Dios tabata mas kayente paden. Pa evitá di wòrdu kimá dor di kandela di Spiritu Santu, e tabata despuesto pa kana pasa dor di e kandela di persekushon.

Jeremias tabata naturalmente tímido, sensibel, kariñoso, suave, emoshonal, ku hopi pasenshi, simpatiko i leal pa ku su paisanonan. Ma Dios a dun’ é un mensahe severo i pisá...un mensahe ku no solamente a parse kiboká, ma asta traishonero. Por aparentá ku Jeremias su personalidat no a kuadra ku su enkargo tan severo. Segun John Graybill, Jeremias tabatin “miedu di hende, un persona ku nos lo a pensa no ta apto pa e trabou ku e mester hasi. E echu ku el a tene duru na su tarea durante e siguiente añanan di rechaso i persekushon ta un elogia pa ku e kalidat di e hòmber ku e tabata i tambe pa ku e grasia di Dios, ku isolá di esei su personalidat sigur lo a kibra na wèrki.”

Ma maske e tabatin un karakter suave, esei no a surpasá su fieldat na Dios i su amor pa e rektitut di Dios. E mensahe di Dios por tabata severo, tòg dia tras dia el a predik’ é fiel! Poko profeta a eksperensíá un reakshon tan hostil pa ku nan mensahe. Ma apesar ku hende a rechas’ é, no a skuch’ é, a kibr’ é, menas’ é, maltrat’ é, tòg el a persistí. Konsekuentemente un estudiante di Beibel a yama Jeremias “e hòmber di mas kurashi i di mas grandi di Tèstament Bieu.”

Jeremias no a gusta e mensahe ku Dios a dun’ é pa proklamá. El a sinti e doló di e huisionan ku lo bin pa su paisanonan. E sermon riba su kurason tabata sofokante. E tabata sa ku su profesia lo no kai den bon tera serka su kongregashon. El a hala tras for di e tarea. Su pianan tabata pisá pa bai prediká su mensahe. El a sinti ku e *no por* prediká un mensahe tan pisá. E tentashon lo tabata hopi grandi pa proklamá solamente un parti di e mensahe pa e hudiunan no rechas’ é i su ministerio. Ma tòg Jeremias tabata fiel pa proklamá henter Dios Su mensahe!

Esaki ta un bon lès pa nos. Prediká fiel Palabra di Dios no ke men prediká solamente e partinan ku lo kai den bon tera serka esnan ku ta skucha. Nos mester proklamá *henter* Palabra di Dios, tantu e reprendementunan komo e promesanan, apesar di e kosto personal. Un embahador

ku ta komuniká solamente loke un otro pais ke tende ta un traidó di su mes pais. Igualmente ta muchu mas traishon pa e representante di Dios nenga komuniká Su mensahe den su totalidat.

Maske Jeremias a proklamá fiel Palabra di Dios, nos sa di ningun hende ku a kombertí komo resultado. Ma Dios no ta mira éksito ku e mésun bista ku hende ta mir'é. Di nos perspektiva, Jeremias tabata un frakaso. Ma di Dios su punto di bista, Jeremias tabata un éksito total pasobra el a kumpli fiel ku boluntat di Dios. Nos por ta enkurashá pa e ehèmpel di Jeremias ku a persistí apesar di resultadonan sumamente deskurante pa mas òf ménos mitar siglo. Dios no ta yama nos pa ta popular i éksitoso. E ta yama nos pa ta fiel n'E.

Jeremias tabata masha konsiente ku Dios ta real. Su fe no a tambaliá. Rípidamente el a hasi orashon. E tabata despuesto pa sufri pa Dios.

Segun algun estudiante di Beibel, Jeremias ta e profeta ku karakter mas manera Kristo. Méskos ku Hesus, Jeremias tabata umilde, kurason suave, totalmente fiel, motivashon puru, perseverá ku pasenshi, a sufri sin saka sla, despuesto pa sakrifiká su mes, sumamente preokupá pa su pueblo, yorando pa pueblo di Jerusalèm (Lukas 19:41).

## II. ERA DI E BUKI

Lesá 2 Reinan 22-25 i 2 Krònikanan 34-36 pa haña sa e situashon ku tabata eksistí na Juda den era di Jeremias. Ma nos lo kuminsá promé ku e era ei.

Isaias a proklamá Palabra di Dios. Ma e pueblo no tabata ke tende. Nan tabata disidido pa skohe un kaminda ku lo hiba na destrukshon.

Ora Isaias i bon rei Ezekias a muri, idolatria i abominashonnan pagano a floresé atrobe. Rei Manasés a konstruí altarnan pa Baal den kurá di tèmpel i pone idolonan den tèmpel mes (2 Reinan 21). Pa mas òf ménos mitar s'glo tantu rei, komo saserdote, komo pueblo a blasfemá i insultá Dios. Jeremias 5:31 ta deskribí e situashon: “..profetanan ta profetisá ku engaño, i e saserdotenan ta goberná manera nan ta haña ta bon, i Mi pueblo ta gusta asina!”

Dios no tabata despuesto pa soportá mas. El a posponé Su rabia durante reinado di bon rei Josias. Ma 25 aña despues di su morto, e nashon di Juda no a eksistí mas. Jeremias tabata Dios Su vosero den e situashon deplorable durante ultimo 40 aña di eksistencia di Juda.

Jeremias su ministerio lo a inisiá durante reinado di bon rei Josias, e úniko rei ku a agradá Señor durante ministerio di Jeremias. Josias a reina pa 31 aña. E siguiente rei di Juda tabata Joakaz, ku a reina tres luna so (2 Krònikanan 36:2). Su sucesor, Joakim, a reina 11 aña (2 Krònikanan 36:5). Despues a bin Joakin, ku a reina tres luna i dies dia (2 Krònikanan 36:9). Zedekias, e ultimo rei di Juda, a reina 11 aña, te konkísta di Jerusalèm (2 Krònikanan 36:11). Pues Josias, Joakim, i Zedekias a hunga un ròl mas importante den ministerio di Jeremias.

Diferente profeta lo a profetisá durante Jeremias su ministerio. Nahum lo a profetisá na komienso di reinado di Josias. Pusíbelmente Jeremias a konosé e Sofonias i Habakuk. Ma e profetanan Daniel i Ezekiel tabata na Babilonia durante un parti di Jeremias su bida.

Loke tabata pasando riba e pantaya internashonal tambe ta importante pa sa pa komprendé e profesianan di Jeremias. Por bisa ku era di Jeremias tabata un era ku Asiria, Babilonia i Egipto a batayá bira e super-potensia di medio-oriente i Babilonia a sali viktوريوسo.

E paisnan di Israel i Juda tabata lokalísá nèt meimei di e nashonnan aki hambrá pa poder. Ora nan a bai bringa otro, nan a pasa dor Israel i Juda. Pueblo di Dios tabata e brug ku Egipto a krusa pa bai nort, i Asiria i Babilonia a krusa pa bai sùit. (Asiria ya kaba a konkistá i deportá Israel mas òf ménos shen aña promé ku Jeremias a kuminsá profetisá.)

Pa motibu di nan situashon prekario, Juda tabata kontinuamente tentá pa forma aliansa ku un di e podernan pa haña protekshon kontra e otro poder. Jeremias a prediká, “Drecha ku Dios i konfi'E pa protehá boso di otro nashonnan.”

Na promé parti di Jeremias su ministerio, Juda tabata menasá prinsipalmente pa Egipto i Asiria. Babilonia tabata na punta di derotá impero di Asiria i bira un poder formal. Faraon Necho

di Egipto tabata ke bai yuda Asiria kontra Babilonia. Josias, rei di Juda, tabata masha kontra Asiria i a purba prevení Egipto di yuda Asiria. Pesei el a bai bringa kontra ehersito di Egipto ora nan a pasa den serkania di Juda. Ma Josias a wòrdu matá den e konflikto (2 Rei 24:29-30).

Durante e di dos parti di Jeremias su ministerio, Juda tabata menasá pa Babilonia. Nan a derotá e asironan ora nan a konkistá Ninivé na aña 612 B.C. i a derotá e egipsionan na bataya di Karkemis na aña 605 B.C.

Juda a resistí kontra Babilonia. Ma Jeremias, dirigí pa Dios, a urgí Juda pa entregá na Babilonia pa evitá mas dramamentu di sanger. Koutividat tabata inevitable ma sikiera por evitá destrukshon kompleto. Ma atrobe, nan no a skucha e mensahe di Dios.

### III. LEKTORNAN DI E BUKI

Segun 1:5, Jeremias tabata un profeta na e nashonnan—un ministerio muchu mas amplio ku Juda so. Ma mas tantu e buki tabata dirigí pa Juda i Jerusalèm (kapítulonon 2-45). Israel ya kaba tabata den koutiverio. Ma kapítulonon 46-51 ta dirigí kontra otro nashon tambe: Egipto, Filistia, Moab, Amon, Edòm, Damasko, Kedar, Elam i Babilonia.

### IV. SKIRBIMENTU DI E BUKI

Ningun otro eskritor di Skritura a duna tantu informashon tokante skirbimentu di e buki. Kapítulo 36 ta duna un relato interesante relashoná ku skirbimentu di Beibel.

Nos ke mensioná tres punto relashoná ku skirbimentu di e buki di Jeremias:

#### A. BUKI DI JEREMIAS TA SKIRBÍ PA BARUK

Baruk tabata sekretario di Jeremias i a skirbi loke Jeremias a bis'é pa skirbi (36:4,32). Probabelmente esaki ta e kaso pa henter e buki, maske nos no sa sigur.

#### B. BUKI DI JEREMIAS TA UN BUKI DESTRUÍ

Ora a lesa Jeremias su profesianan dilanti mal rei Joakim, el a kòrta pidanan di e ròl despues ku nan a les'é i a kim'é (36:20-26).

Dios a inspirá Jeremias pa skirbi e buki di nobo (36:27-32). Segun nos sa, esaki ta e úniko buki di Beibel ku ta skirbí dos biaha.

Loke rei Joakim a kima no por tabata e totalidat di e buki di Jeremias. Un gran parti di e buki no por a wòrdu skirbí ainda. Por ehèmpel, kapítulonon 21, 27-29, 32-40, 52 no por a sosodé ainda. Probabelmente nan a skirbi solamente kapítulonon 1-25 di nobo.

#### C. BUKI DI JEREMIAS NO TABATA SKIRBÍ DEN UN SINTÁ

E buki di Jeremias tabata skirbí anto kompilá durante un periodo basta largu...un periodo di ssikiera 40 aña, bou di hopi diferente sirkunstansia. Diferente teksto ta mustra esaki kla debí ku e ta duna diferente fecha i indikashon di tempu:

- Era di Josias – 3:6
- Era di Joakim – 24:1; 25:1; 26:1; 29:2; 35:1; 36:1
- Era di Zedekias – 21:1; 27:1; 28:1; 32:1; 33:1; 34:1,8; 37:1; 39:1

### V. FECHA DI E BUKI

Dios a yama Jeremias “*den e di 13 aña di (Josias) su reinado*” (1:2). Josias a reina di 640 pa 609 B.C., pues, Dios a yama Jeremias na aña 627 B.C., mas òf ménos 60 aña despues di morto di Isaias.

Jeremias su ministerio a kontinuá durante reinado di ultimo kuater rei di Juda: Joakaz, Joakim, Joakin i Zedekias (609-586 B.C.). Ya kaba esaki ta 41 aña ku Jeremias lo a profetisá.

Klaramente e evento sentral den e buki ta e kaída di Jerusalèm na aña 586 B.C. Jeremias su ministerio a tuma lugá promé i durante e evento aki. Ma Jeremias su ministerio no a kaba ku destrukshon di Jerusalèm. No ta konosí kuantu aña mas su ministerio a kontinuá.

Di tur manera nos por bisa ku e buki no a keda kompletá te despues di aña 586 B.C. ma sin duda promé ku aña 560 B.C.

## **VI. PROPOSITO PA E BUKI**

Nos por menshoná diferente pusíbel proposito pa e buki:

A. Pa eksponé hopi di e reformashonnan religioso komo algu superfisial—ku kurason di e hendenan di Juda di bèrdat tabata sigui e mésun ruta ku Israel a sigui...ku a guia na kaptividat. (Esaki ta apliká mas tantu na komienso di Jeremias su ministerio, den dianan di rei Josias, ku a introdusí reformashon religioso i a kombatí idolatria.)

B. Pa supliká Juda pa repentí di nan piká. Despues el a hañ'é forsá pa anunsiá nan kaptividat pasobra nan a persistí den piká. Di bèrdat por bisa ku tema di e buki ta e pika di Juda a okashoná kaptividat bou man di Babilonia.

E buki ta muestra kla ku nashonnan ta kai pasobra nan ta bandoná Dios. Polítikonan di Juda a kere ku nan problema tabata ku nan ta lokalísá meimei di nashonnan poderoso, Egipto i Babilonia. Ma Jeremias a deklará bon kla ku kousa di nan problemanan ta nan rechaso di Dios.

Awendia, tin e mésun situashon. “Ekspertonan” ta afirmá ku nos problemanan ta kousá pa esaki òf esei. Ma nan ta kikoká. A eskritor ruso durante era komunista na Rusia, Aleksandr Solzhenitsyn, a bisa ku ora e tabata mucha el a tende hende hasi pregunta dikun nan ta eksperenshá tantu problema. I e kontesta ku su grandinan a duna ta, “Pasobra nos a bandoná Dios.” Solzhenitsyn a bisa ku no tin mihó konklushon ku esei. Ora un pueblo ta bandoná Dios, nan *lo* sufri e kastigu di Dios finalmente.

C. Pa trese un mensahe di huisio na nashonnan rònt di Juda tambe – kapítulonnan 46-51

D. Pa fiha e tempu di kaptividat komo un tempu limitá di 70 aña (25:11; 29:10)

## **VII. OPSERVASHONAN DI E BUKI**

Isaias tabata un eskritor maestral. Ma e buki di Jeremias sin duda ta un di e gran bukinan profétiko di Tèstament Bieu.

### **A. PALABRANAN IMPORTANTE**

Babilonia ta un palabra hopi usá den e buki (170 biaha). Di bèrdat, nòmber di e stat ta usá mas biaha den e buki di Jeremias ku henter restu di Beibel kombiná. Tambe kaldeonan (habitantenan di Babilonia) i Kaldea ta usá 46 bes. Tambe ta notabel ku e palabra Babilonia no ta aparesé den e buki promé ku 20:4 i Kaldea òf kaldeonan tampoko ta usá promé ku 21:4.

Un ekspreshon interesante ku ta aparesé den e buki ta “mi pueblo”. Tantu Jeremias komo Dios ta us’é pa ku pueblo di Juda. E ta usá 46 bes. Maske Jeremias a ser tan maltratá pa su pueblo, tòg el a keda yama nan “mi pueblo”.

Dos otro palabra ku ta bin dilanti ta e palabra “bandoná” (31X) i “bolbe” (50X). Den un sintido, e dos palabra ta e mensahe prinsipal di e buki: “boso a bandoná Dios; bolbe serka djE!”

### **B. KLASE DI LITERATURA**

Buki di Jeremias ta konsistí di diskursonan, hopi di nan skirbí na un forma poético, i narashon. Hopi di e narashon ta informashon históriko—di kua un gran parti ta outo-biográfiko.

Jeremias tambe a hasi uso di diferente obhéto, símbolo òf akshon pa komuniká:

1. Faha di lino (13:1-11)
2. Butishi di biña (13:12-14)
3. E selibasia di Jeremias (16:1-9)
4. E alfarero i e klei (18:1-19:14)
5. Butishi di klei kibrá (19:1-13)
6. Dos makutu di figo (24:1-10)
7. Yugo (27:1-28:17)
8. Kumpra kunuku na Anatot (32:1-44)
9. Skonde piedranan (43:8-13) R
10. Ròl ta hundi den Riu Eufrates (51:59-64).

### C. NO KRONOLÓGIKO

Ta visto ku Jeremias su sistema tabata mas tantu topikal, no kronológiko. Ta difísil (òf asta impusibel) pa haña un liña kronológiko. Por ehèmpel, 21:1 ta laga sa ku Zedekias tabata reina. Anto 25:1 ta bai bèk den tempu na e di kuater aña di reinado di Joakim. E siguiente kapítulo (26:1) ta bai bèk na komienso di reinado di Joakim, mientras ku 27:1 ta sosodé na komienso di reino di Zedekias.

Ma si tin un liña general (no den detayenan) den e buki. E punto kulminante ta yega na e konkista i kaída di Jerusalèm. Tin dos relato distinto di esaki den e buki (kapítulonon 39 i 52). Tur e kapítulonon promé ku kapítulo 39 (tantu diskursonan komo narashon) a tuma lugá promé e kaída di Jerusalèm. Tur e kapítulonon despues di e kapítulo aki ta tuma lugá despues (òf durante) e konkista di Jerusalèm.

### D. PROFESIANAN DEN E BUKI

E buki ta kontené diferente profesia: ku Babilonia lo konkistá i destruí Jerusalèm i e tèmpep (profetisá hopi biaha), Joakin lo ta kapturá i hibá Babilonia (22:24-28), morto di Hananias (28), èts. Ma nos ke nota algun otro profesia ku ta destaká:

1. Profesia di 70 aña di kaptividat

Bes tras bes Jeremias a profetisá ku e hudiunan lo ta konkistá i hibá den eksilio. Den “den e di kuater aña di Joakim”, Jeremias a profetisá ku e eksilio di pueblo di Juda lo dura 70 aña (25:11-12), un profeisa hasí 18 aña promé ku kaída di Jerusalèm i deportashon di pueblo di Juda.

Tantu Isaias komo Jeremias a profetisá tokante restorashon di hudiunan na nan tera despues di eksilio. Jeremias a mira siertu kos ku Isaias no a nota. Segun 30:3; 31:8-30,31-37; 32:36-44; 33:6-18, Jeremias a laga sa ku e regreso di hudiunan na e tera primintí despues di 70 aña no ta kompletashon total di e profesia. El a pre-mirá un restorashon mas amplio ku esei. Por ehèmpel, e tekstonan aki ta mensioná ku tantu Juda komo Israel lo regresá. Nan ta papia di un regreso no solamente for di Babilonia, ma for di tur e nashonnan. Ademas, Jeremias a referí na un aliansa nobo, gran prosperidat i bendishon, gran tristesa pa piká i obedensia di pueblo di Dios.

2. Profesia di destrukshon di Babilonia

Nèt promé ku el a klousurá su buki (50-51), Jeremias a kondená nashon di Babilonia. A parse absurdo pa profetisá algu asina, pasobra Babilonia tabata un impero poderoso e tempu ei. Ma Dios sa di kiko E ta papia. E profesia a wòrdu kumplí palabra pa palabra. Siro a konkistá Babilonia na aña 539 B.C. Ma no tabata te 500 aña despues ku e murayanan a keda destruí, kumpliando ku Jeremias su profesianan tokante Babilonia.

3. Profesianan di futuro glorioso



Maske Jeremias a profetisá ku Dios lo kastigá Juda dor di permití ehersito di Babilonia pa konkistá nan, tòg el a mira mas leu den futuro na un era glorioso pa e pueblo hudiu. Diferente teksto ta mostra ku pueblo di Dios lo regresá, tuma poseshon di nan tera, ku Mesias lo reina i e gloria di Su reino lo no tin fin (3:16-18; 12:14-16; 16:14-15; 23:3-8; 30:1-10,17-22; 31:1-40; 32:37-44; 33:1-26).

## VIII. STRUKTURA I KONTENIDO DI E BUKI

Ta sumamente difísil—sino impusíbel—pa traha un skema kronológiko di e buki di Jeremias. Por ehèmpel, kapítulon 1-12 lo a tuma lugá prinsipalmente durante reinado di Josias. Joakim lo a reina tempu ku e siguiente kapítulon a wòrdu skirbí: 13-20 i 24-26 i 35 - 36. I Zedekias tabata sinta riba trono di Juda den kapítulon 21, 22, 23, 27, 28, 33-39.

Tòg aki tin dos skema i algun komentario.

### I. INTRODUKSHON – 1

Yamada di Jeremias

### II. DISKURSONAN – 2-20

A. Sermomnan públiko – 2-10

B. Eksperensianan personal – 11-20

### III. PROFESIANAN SPESIAL – 21-33

A. Siertidat di kaptividat – 21-29

Manera nos a mira ya kaba, den 25:9-12 Jeremias a profetisá ku durashon di e eksilio lo ta 70 aña. Dor di e skuridat profundo, Jeremias tòg por a mira klaridat i a papia di un futuro glorioso pa pueblo di Dios (23:3-8; 30-31; 33:15-22).

B. Buki di konsolashon – 30-33

Isaac Williams ta bisa ku kapítulon 31-33 ta e teksto mas elokuyente di amor i tristesa mesklá ku konsuelo den tur Skritura. Den e kapítulon aki, Jeremias a mira mas leu den futuro...despues di eksilio. El a pre-mirá e resotrashon di e pueblo hudiu. El a wak mas leu ku e aliansa bieu i a pre-mirá e aliansa nobo (31:31).

### IV. NARASHON – 34-44

A. Atake i kaída di Jerusalèm – 34-39

B. Despues di kaída di Jerusalèm – 40-44

E sekshon aki ta duna dos impreshon kla: 1) Jeremias a keda mes fiel na Señor despues di kaída di Jerusalèm ku e tabata promé. 2) E hudiunan a kada mes terko i indespuesto pa repentí despues di e kaída di Jerusalèm ku nan tabata promé.

### V. ADISHONNAN – 45-52

A. Mensahe pa Baruk – 45

B. Mensahe pa nashonnan pagano – 46-51

C. Kaída di Jerusalèm - 52

Nos ke duna un otro perspektiva di e buki i pues ta inkluí un otro skema aki.

### I. PROFESIANAN DI JEREMIAS – 1-25

### II. SEKSHON HISTÓRIKO – 26-36

### III. SEKSHON BIOGRÁFIKO – 37-45

### IV. PROFESIANAN KONTRA NASHONNAN – 46-52

Den e sekshon aki, e proklamashonnan di Jeremias kontra hende òf nashonnan, normalmente ta introdusí ku e palabranan, “Asina SEÑOR ta bisa” (47:2; 48:1; 49:1,7,28,35; 50:18,33; 51:1,33,36,58).

Pa klousurá, nos ke mensioná algun otro punto ku ta destaká den e buki di Jeremias.

## A. YAMADA DI JEREMIAS

Jeremias a risibí su yamada pa ta profeta na un manera ketu—nada spektakular manera e yamada di Isaias. Jeremias tabata bastante hóben ainda. Dios a lag'é sa ku El a skoh'é promé ku el a nase mes (1:4-5). E tabata tímido pa hasié pasobra e tabata hóben i a falta eksperensia (1:6). Ma Dios no a pèrmitié rechasá e ministerio (1:7). Dios a sigur'é ku E lo proteh'é (1:8).

Maske Dios lo mester kastigá Juda, tòg E tabata ke un persona ku lo ta fiel pa avisá Juda di Su huisio binidero, i pa konsolá e pokonan ku ta fiel.

## B. MENSAHE DI JEREMIAS

Jeremias su mensahe a kontené dos parti. 1) Destrukshon. El a reprendé habitantenan di Juda pa nan piká i a avisá nan di Dios Su huisio binidero. 2) Konstrukshon. Dios lo kumpli ku Su promesanan pa ku Su pueblo i bendishoná nan despues di kastigá nan.

Ta bon pa mensioná ku Jeremias a laga sa ku e kastigu lo bin for di nort (1:13-15; 4:6; 6:1,22; 10:22; 13:20; èts.). Ora nos ta wak un mapa di medio oriente durante era di Beibel, por mira ku Babilonia tabata lokalísá pariba di Juda, no nort. Ma tabatin un desierto entre Babilonia i Juda. Den e era ei, hende no a hasi viahenan dor di desierto. Pesei, nan ta biaha nort-wèst, siguiendo e riu Eufrates, te ora nan a yega na loke ta konosí awendia komo e pais di Turkia. Anto e ruta e bai suit te pasa Juda. Pesei, for di perspektiva di e pueblo di Juda, nan enemigu, ehersito di Babilonia, a bin for di nort, maske Babilonia mes tabata lokalísá pariba di Juda.

## C. KONFESHONAN DI JEREMIAS

Buki di Jeremias ta kontené hopi informashon tokante e outor mes—en kontraste di Isaias ku ta konta masha poko di su persona. Lektornan di su buki por mira Jeremias su reakshon i konfeshonnan (10:23-24; 11:18-12:6; 15:10-18; 17:9-11,14-18; 18:18-23; 20:7-18).

## Literatura Konsultá

Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 367-373.

Baxter, J. Sidlow, *Explore the Book* (Grand Rapids: Zondervan Publishing House, 1960), vol. 3, p. 257-276.

Benware, Paul N., *Survey of the Old Testament* (Chicago: Moody Press, 1988), p. 209-212.

Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 103-105.

Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 73.

Freeman, Hobart E., *An Introduction to the Old Testament Prophets* (Chicago: Moody Press, 1972), p. 237-250.

Harris, R.L., Merrill Tenney, ed. *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 3, p.

Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 327-333.

Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 336-350.

McGee, J. Vernon, *Thru the Bible* notes, p. 214-215.

Mears, Henrietta C., *What the Bible is All About* (Minneapolis: World Wide Publications, 1966), p. 221-239.

Miller, Adam W., *Brief Introduction to the Old Testament* (Anderson, Indiana, Warner Press, 1964), p. 134-140.

Wood, Leon J., *The Prophets of Israel* (Grand Rapids: Baker Book House, 1979), p. 329-340.